

## Broukzitterd

Ein laezing euver Broukzitterd in Zitterd! Veur vööl Haane waar dat vruiger get wie d'n duuvel verzuike! Nog erger es Gelaen en Zitterd!

Toch zeen die twee door de ganse gesjichte haer ònlosmaakelik mitein verbònje en zeker de nao-oorlogse ginneraase haet dao neit vööl weit mee van.


En die van Broukzitterd moosjte hun agraarische proodukte, hun verkes, hounder en eier, toch kwiet en woo koos dat baeter op loupafsjtandj, oppe Zittesje mert en omliGGende sjtraote? En nao de kreig vònje vööl luu hun besjtaonszeekerheid in de



Laammaekessjtad en wievööl jònges en maedjes höbbe hunne kòmpel beiderzieds gevònje? En waat hauwe VVS, Boys en Sittardia ooits mòtte beginne zònger dae aanwas oet Broukzitterd, om mer neit te sjpraeke van de fitserennesj. En wievööl!

En of ze dao sjoon vrouwluu hauwe, die de henj neit verkeerd hauwe sjtaon en van wante wòste!

En prechtige euverbliefsele van ein riek verleede op en røndj de grooten haaf of in de naobieheid van Broukzitterd zeen te zeen in 't Zittesj mezeiem, woo Zitterd nog eine punt aan kènt zoega! En Oorkonde 42 van de Abtei Siegburg oet 1144 kènt röstig konkurreiere met Zitterd 1243!



Alleney zaakes woo Broukzitterd greutsj op kènt zeen en Zitterd maag dankbaar zeen dat dae "foute" burgemeister òs in 1942 bie-ein haet gebrach. Haet hae toch nog get gouts gedaon! Zodoende kènne veer allewiele zèGGe dat de sjaag aan de Kempekoel **in** Zitterd en neit **bie** Zitterd haet plaatsjgevònje!

En al is de sjtaase d'r neit mee, sjus wie vööl in Zitterd, Broukzitterd blif dik de muite waerd, zoowaal vanoet zien sjoon bewaard gebleve dörpsgezich es vanoet de trökblik dae gegaeve kènt waere op bekènde Broukzitterder, femiejes, gebroeke en vereiniginge.



Dankeswaard is de hulp en infermaase, die ich gekrege höb van versjeie auwd Broukzitterder, die mich es bròn höbbe gedeind en mich lètterlik en feguurlik de waeg geweze höbbe.

**Ich wunsj uch eine sjoonen aovend toe!**

Jos Engelen